

## OL TJING BLONG KRAES

**B**long longtaem, ol tijing blong Jisas Kraes insaed long Baebol, i stap olsem wan ples we ol man long wol oli stap kasem insperesen long hem. Antap long hemia, i gat sam moa tijing blong Sevya i stap insaed long wan buk blong ol skripja—Buk blong Momon: Wan Narafala Testeman blong Jisas Kraes. Baebol tugeta wetem Buk blong Momon, bae oli givim long yu wan pis we i stap blong longtaem mo glad, taem oli stap givim long yu rod blong yu folem long laef blong yu.

Blong kasem wan fri kopi blong Buk long Momon: Wan Narafala Testeman blong Jisas Kraes, visitim ples ia long intanet we oli putum daon ia o raet i kam long:

JOS BLONG  
**JISAS KRAES**  
BLONG  
OL LATA-DEI SENT

[www.mormon.org](http://www.mormon.org)

## TESTEMONI BLONG PROFET JOSEF SMIT

Jos blong Jisas Kraes  
blong ol Lata-dei Sent



© 2006 i kam long Intellectual Reserve, Inc.  
Oli holem evri raet. Oli printim long Yunaeted Stet blong Amerika  
Oli letem long Inglis: 2/05. Oli letem translesen: 2/05  
Translesen blong *The Testimony of the Prophet Joseph Smith*  
Bislama. 32667 852

Penting long kova long fored: *Brata Josef*, we i kam long  
David Lindsley  
Penting long kova long bak: smol pis blong *Hem i Laef*,  
we i kam long Del Parson

BISLAMA



## Josef Smit: Wan Profet blong God

**T**aem Josef Smit i bin gat 14 yia, hem i wantem save wanem jos nao bae i joenem, mekem se hem i bin askem God wetem wan tru prea. Olsem wan ansa long prea ia, God we i Papa mo Pikinini boe blong Hem, Jisas Kraes, Tufala i bin soem Tufalawan long Josef, mo talem long hem se, tru Jos blong Jisas Kraes i nomo stap long wol, mo oli jusum Josef blong i stanemap Jos ia bakegen.

Stat long dei ia, Josef i wok had blong sevem God. Hem i wok blong stanemap Jos blong Jisas Kraes blong ol Lata-dei Sent mo blong bildim Kingdom blong God i kam antap long wol long ol las dei. Ol memba we oli gat strong fet long Jos, oli stap witnes se Jisas Kraes Hem i Sevya mo Ridima blong wol. Jisas i stap lidim Jos blong Hem tedei, tru long revelesen i go long wan profet long wol. Josef Smit hem i bin wan long ol Profet ia. Nomata we hem i finisim plante samting long laef blong hem, samting



*Taem hem i stap tingting wijwan jos blong i joenem, Josef i bin lukluk long Baebol blong talem long hem wanem blong mekem. Long ples ia, hem i bin ridim, "Askem long God."*

*we hem i bin mekem we i moa impoten, hem i strong tingting blong hem, blong i stap olsem wan disaepol mo witnes blong Jisas Kraes. Profet Josef Smit mo Sydney Rigdon tufala i bin talem se afta plante long ol testimoni we oli bin givimaot abaot Sevya, laswan long evriwan, se Hem i stap laef!" (luk long Doctrine and Covenants 76:22).*

*Olgeta we oli kasem testimoni blong Profet ia tru long Paoa blong Tabu Spirit, bae oli save trutok long wanem we oli singoatem hem blong mekem. Mo tu, bae oli save pis mo glad ia we i kam tru long Sevya, Jisas Kraes, we Josef Smit i bin wosipim mo sevem.*

## Wijwan Jos i tru?

*Josef Smit i bin bon long yia 1805 long Sharon, Vermont. Long taem ia we storian ia i stat, hem i bin gat 14 yia; Hem i stap wetem ol famle blong hem long Niu Yok mo hem i stap trae had blong jusum wanem jos blong joenem. Hemia, hem i wanem we Josef i bin go tru long hem, we oli raetem folem ol toktok blong Josef, hemwan.*

**L**ong medel blong taem ia we ol man oli gat bigfala interes long ol defren Jos, tingting blong mi i bin wok bigwan mo maen blong mi i trabol bigwan. . . . Samtaem mi talem long miwan: i gat wanem i stap blong mekem? Wijwan long evri grup ia oli tru; o evriwan long olgeta, oli rong? Sapos eniwan long olgeta oli tru, wijwan long olgeta, mo olsem wanem nao, bae mi save?

Long sem taem we mi stap hadwok long medel blong raorao blong ol grup blong ol man blong rilijin, mi bin stap ridim, wan dei, buk blong Jemes long nambafaef ves blong japta wan, we i stap talem se: "Sipos wan long yufala i no gat waes, hem i mas askem long God blong i givim waes long hem, from we fasin blong God, hem i no save tok nogud long man we i askem samting long hem, hem i stap givim ol samting long ol man long gladhat blong hem."

Neva, wan toktok blong skripja i kam wetem paoa long hat blong man bitim hemia we i kam long hat blong mi long taem ia. I bin luk olsem

we i kam insaed wetem bigfala paoa i go insaed long evri filing blong hat blong mi. Mi bin tingting bigwan long hem, plante taem, wetem save ia se, sapos eni man i nidim waes long God, hem i mi; be olsem wanem blong mekem, mi no save, mo sapos nomo mi save kasem moa waes bitim wanem we mi bin gat, bae mi neva save; from ol tija blong rilijin blong ol defren grup, oli andastanem ol sem toktok long skripja long ol defren wei, olsem we oli wantem waepemaot evri tras taem oli stap ansarem ol kwestin folem wanem we i stap long Baebol.

Long en, mi bin kam long tingting ia se, bae mi mas stap long tudak mo no save wanem blong mekem, o mi mas mekem olsem we James i stap poenemaot, hemia, i blong “askem God” wetem las tingting ia se, sapos Hem i givim waes long olgeta we oli no gat waes, mo bae Hem i givim wetem glad hat mo i no gat toktok, bae mi save traem.

### Fas Visen blong Josef Smit

**F**olem hemia, wetem strong tingting blong mi blong askem long God, mi bin go insaed long ol bus blong traem mekem. Hem i long wan moning blong wan naesfala, klia dei, long



stat blong spring blong yia eitn twante. Hem i bin fas taem long laef blong mi, blong traem mekem wan samting olsem, from long medel blong ol wari blong mi, mi neva traem yet blong talem prea.

*Wan long  
Tufala . . . i bin  
talem, wetem  
fingga blong  
Hem i poenem  
narawan—  
“Hem, Hem  
i Pikinini blong  
Mi we Mi Lavem  
Tumas. Lisin  
gud long Hem!”*

Afta we mi bin go long ples we mi bin plan blong go, mo afta we mi lukluk raon, mo faenem se mi stap miwan, mi bin nildaon mo stat givim ol samting we hat blong mi i wantem long God. Taem mi jes stat blong mekem samting ia, kwik taem nomo sam paoa i tekem mi mo holem taet gud mi, mo paoa blong hem i strong tumas long mi olsem we i wantem holem

taet tang blong mi, blong mi no save toktok. Tudak we i tik, i raonem mi, mo i luk olsem, long mi, blong samtaem, olsem se oli stap givim mi, wan panismen blong ded kwik taem.

Be, wetem evri paoa blong mi blong singaot long God blong Hem i mekem mi fri long paoa blong enemi ia we i bin holem mi, mo long stret taem ia, taem we mi stap rere blong lusum hop mo letem mi ded—i no long ded we mi stap tingting long hem, be long paoa blong wan man long wan wol we yumi no save luk we hem i wan bigfala paoa ia we mi neva filim long eni man bifo—long stret taem ia blong bigfala fraet ia, mi bin luk wan laet, i saen antap i kam daon, stret antap long hed blong mi, mo saen blong hem i bitim hemia blong san, mo hem i saen i kam daon gogo, i kasem mi.

**L**ong stret taem ia we laet ia i kasem mi, mi faenem miwan se mi fri long enemi we i bin holem mi. Taem we laet ia i stap saenem mi, mi bin luk tu Man, we i nogat wan toktok we i save tokbaot saen mo glori blong Tufala, mo Tufala i stap flot nomo antap long mi. Wan long Tufala



i toktok long mi, mo singaotem nem blong mi mo talem wetem fingga blong Hem i poenem narawan se “Hem, Hem i Pikinini blong Mi we Mi Lavem Tumas. Lisin gud long Hem!”

**S**amting we mi wantem go from long Lod blong askem, hem i blong save wijwan long evri grup blong rilijin ia i tru, blong bae mi save wijwan nao blong joenem. I no longtaem afta we tingting blong mi i kambak, mekem se mi save toktok, mi bin askem long Tufala ia we Tufala i stanap antap long mi long laet, se wijwan long ol grup ia i tru (from long taem ia, neva insaed long hat blong mi i talem se olgeta evriwan oli rong)—mo wijwan nao mi mas joenem.

Tufala i bin ansa long mi se, bae mi no mas joenem wan long olgeta, from olgeta evriwan oli rong, mo Man ia we i stap toktok long mi i bin talem se evri toktok blong bilif blong olgeta, oli olsem doti long fes blong hem, mo olgeta we oli skul gud, olgeta evriwan oli stap giaman, mekem se “oli kam klosap long mi wetem maot blong olgeta, be hat blong olgeta oli stap longwe long mi, oli givim ol tijing we i komanmen blong ol man, blong mekem olgeta i olsem wan god, be oli no luksave paoa blong ol tijing ia.”

Bakegen, Hem i blokem mi blong no joenem eniwan long olgeta; mo Hem i talem long mi, plante moa nara samting, we mi no save raetem naoia. Taem tingting blong mi, i kambak bakegen, mi faenem se mi stap slip long baksaed blong mi, mo stap lukluk antap i go long heven. Taem laet ia i go, mi no bin gat paoa; be i no long taem mi stap karembak paoa, mo mi go long haos.

## Ol Hadtaem

*Josef i bin obei long God mo no joenem eni Jos we i stap. Taem hem i talem long ol man, wanem hem i bin luk mo harem, hem i stat blong fesem plante toktok mo hadtaem.*

**I**no long taem mi faenem . . . se storian blong mi i bin mekem se ol man we oli skul gud long rilijin oli stap mekem plante giaman toktok agensem mi, mo hemia i statem bigfala hadtaem, we i stap gohed blong kam antap; from we mi jes wan smol boe nomo, blong bitwin fotin mo fiftin yia, mo laef blong mi i wan laef we i no pulum intres nating long wol ia, be nomata long hemia, ol bigfala mo haeman ia oli tekem inaf intres blong mekem tingting blong pablik i save wok agensem mi, mo statem olgeta hadtaem we i nogud tumas; mo hemia i hapen oltaem insaed long ol grup ia—evriwan oli stanap tugeta blong spolem mi.

Mo samtaem, stat long taem ia, hemia i mekem se tingting blong mi i wok bigwan, se olsem wanem nao, wan smol boe we i jes kasem fotin yia, mo wan tu we hem i mas wok evri dei blong kasem wan gudfala laef, bae hem i wan

man we i impoten tumas blong hem i pulum ae blong ol bigfala man mo grup blong taem ia, long wan wei we i save kosem wan rabis filing insaed long olgeta blong tokbaot nogud mi. Be, hem i strenj o no, hem i bin olsem ia nao, mo samtaem hem i stap olsem stamba blong bigfala sore long miwan.

Nomata long hemia , hem i bin wan samting we i tru, hem i bin hapen, we mi bin luk wan visen. Stat long taem ia, mi filim olsem Pol, taem hem i difendem hem long fored blong King Akripa, mo talem storian blong visen we hem i bin gat taem hem i luk wan laet, mo harem wan voes; be nomata long hemia, i bin gat smol nomo we oli biliv long hem; sam oli talem se hem i giaman, mo ol narawan oli talem se hem i krangke; mo oli bin jikim hem mo tok nogud long hem. Be hemia i no waepemaot trutok blong visen blong hem. Hem i bin luk wan visen, hem i save se hem i luk, mo evri hadtaem long wol oli no save mekem samting ia i defren; mo nomata we oli mas givim hadtaem long hem kasem ded, yet hem i save, mo bae hem i save, go kasem taem we hem i pulum las win blong hem, se hem i bin luk mo harem tugeta, wan laet mo wan voes we i stap toktok long hem, mo evri man long wol bae oli no save mekem hem i tingting o biliv se samting ia i no tru.

**H**em i bin olsem ia nao wetem mi. I tru, mi bin luk wan laet, mo long medel blong laet ia, mi bin luk tu Man, mo i tru se Tufala i toktok long mi; mo nomata ol man oli no laekem mi mo givim hadtaem long mi, from mi bin luk wan visen, yet hem i tru; mo long taem ia we oli stap givim hadtaem long mi, mo stap sakem ol rabis toktok long mi, mo stap mekem ol giaman rabis toktok agensem mi from mi talem olgeta samting ia, hat blong mi i stap lidim mi blong talem se: From wanem yufala i stap givim hadtaem long mi from mi stap talem trutok? Hem i tru, mi bin luk wan visen; mo huia nao mi, blong stanap agensem God, o from wanem wol ia i ting se bae hem i mekem mi blong talem se samting we mi bin luk i no tru? From mi bin

luk wan visen; Mi save hemia, mo mi save se God i save hemia, mo mi no save talem se i no tru, neva bae mi gat strong tingting blong mekem samting ia; mi bin save se sapos mi mekem samting ia, bae mi mekem God i harem nogud, mo bae Hem i panisim mi.

*Mi bin luk wan visen; Mi save hemia, mo mi save God i save hemia, mo mi no save talem se i no tru, neva bae mi gat strong tingting blong mekem samting ia.*

Naoia mi mekem tingting blong mi i stret, long saed blong ol grup blong rilijin—se i no wok blong mi blong joenem eniwan long olgeta, be blong gohed olsem we i stap kasem taem we mi kasem eni moa samting blong mekem. Mi bin faenemaot se testimoni blong Jemes i tru—se man we i nogat waes, i

save askem long God, mo kasem, mo bae Hem i no save talem wan strong toktok.

Mi gohed blong folem wanem mi stap mekem long evri dei laef kasem long namba twantewan blong Septemba, Eitin Twantetri, mo long taem mi stap kasem ol hadtaem we i strong tumas long ol defren grup blong ol man, long saed blong rilijin mo olgeta we oli no joenem wan rilijin, from nomo, mi stap gohed blong talem strong se mi bin luk wan visen.

Long medel blong taem ia we mi bin luk visen mo long yia Eitin Twantetri—olsem we God i blokem mi blong joenem ol grup blong rilijin long taem ia, mo mi yang tumas, mo olgeta we oli stap givim hadtaem long mi, oli save stap olsem ol fren blong mi mo kaen long mi, mo ating oli ting se, wan samting i bin trikim mi blong mas traem long wan stret mo gudfala wei blong winim bak mi—Mi bin fesem ol temtesen blong eni kaen; mo miks wetem eni kaen man, plante taem mi foldaon long plante krangke rong, mo soemaot ol ples we ol yangfala oli no strong long hem, mo ol fasin blong man; we mi mas

sore blong talem se, i lidim i go insaed long ol temtesen, we i no gud tumas long fes blong God. Taem mi stap mekem konfesen ia, yu no ting se mi harem nogud from mi bin foldaon long wan long ol bigfala sin. I neva wan fasin blong mi, blong minim blong mekem wan sin olsem.

## Visit blong Moronae

*Ol hadtaem i stap gohed mo semtaem Josef i no wantem talemaot se hem i no tru, se hem i bin luk God. Long 21 Septemba 1823 afta hem i go long bed, Josef i bin prea blong save se hem i stap olsem wanem bifo long Lod. Enjel Moronae i kamaot long hem.*

**L**ong naet blong namba twantewan blong Septemba, bifo mi ledaon long bed blong mi blong silip long naet ia, mi bin go askem mo prea long God we i gat Bigfala paoa mo askem blong fogivim evri sin mo ol rong blong mi, mo tu blong Hem i soemaot long mi, blong bae mi save wea ples nao mi stap long hem bifo long Hem; from tingting blong mi i bin strong se

hem i soemaot wan samting long mi, olsem we mi bin kasem wan bifo.

Taem we mi bin stap rere blong mekem prea, long God, mi bin luk wan laet i stap kamaot long rum blong mi, we i bin gohed blong gru kasem taem we rum blong mi i laet moa, bitim medel dei, we wan taem nomo, wan enjel i bin kamaot klosap long bed blong mi, mo hem i stanap nomo long ea, from ol leg blong hem i no bin tajem graon.

Hem i bin werem wan longfala klos we i slak long bodi blong hem mo waet kala blong hem i naes tumas. Waet kala ia i bin bitim evri samting we i waet long wol ia, we mi bin luk bifo; mo mi no bilivim se i gat eni samting long wol ia, we oli save luk waet mo saen blong hem i olsem ia. Ol han blong hem i neked, mo ol han blong hem tu, smol antap long joen blong han; tu, olsem, ol leg blong hem i bin neked smol antap long ol angkol. Hed mo nek blong hem tu, i no gat klos i kavremap. Mi bin save faenemaot se hem i no bin werem eni narafala klos be longfala klos ia nomo, from i bin open we mi save luk jes blong hem.

I no longfala klos blong hem nomo i stap waet tumas, be ful bodi blong hem i saen, mi no save olsem wanem blong tokbaot samting ia, mo fes blong hem i saen olsem laetning. Rum blong mi tu i bin laet olgeta, be i no saen bigwan olsem laet raonabaot bodi blong hem. Taem we mi bin luk long hem blong fastaem, mi bin fraet; be afta smol taem nomo, fraet blong mi i bin lus.

Hem i bin singaotem mi long nem blong mi, mo i bin talem long mi se hem i wan mesenja we God i bin sendem hem aot long fes blong hem i kam long mi, mo nem blong hem i Moronae, we God i gat wan wok we Hem i wantem mi blong mekem. Mo plante man bae oli laekem nem blong mi, mo plante man bae i no laekem nem blong mi, long medel blong evri kantri, famle, mo ol lanwis, o se nem blong mi bae oli tokbaot nogud long medel blong evri pipol.



*Tri yia afta fas visen blong Josef Smit, God i bin sendem enjel Moronae blong tijim Josef blong putumbak gospel blong Jisas Kraes.*

**H**em i bin talem se i bin gat wan buk we oli bin berem, we oli bin raet long ol buk we oli mekem wetem gol, oli givim wan histri blong ol man bifo we i bin stap long kantri ia, mo ples we oli bin kamaot. Hem i talem tu se gospel we i fulwan we i no gat en, i bin stap insaed long hem, olsem we Sevyia i bin givim long ol man we i bin stap bifo;

Mo tu, se i bin gat tu ston insaed, long ol silva bonara—mo tufala ston ia, i joen wetem wan plet olsem hemia blong kavremap jes, mo oli singaotem Yurim mo Tumim—oli bin berem wetem ol buk ia; mo ol man we i holem mo yusum ol ston ia, i samting we i bin mekem “ol sia” long olfala taem; mo God i bin mekem rere olgeta from stamba tingting blong transletem buk ia.

**A**fta we hem i talem long mi ol samting ia, hem i bin stat blong ripitim ol profesi blong Ol Testeman. Hem i talem fastaem pat ia blong



*421 yia afta Jisas Kraes i bon, Profet ia, Moronae i bin berem ol tabu rekod blong ol pipol blong hem long Hil Kumora. Afta we hem i kambak olsem wan we i laef bakegen afta ded, hem i bin tokbaot long Josef, ol rekod ia blong longtaem bifo, we i gat insaed fulnes blong gospel olsem we Sevyia i bin givimaot long ol man bifo we oli stap long graon blong Amerika. Rekod ia, hem i Buk blong Momon.*

nambatri japta blong Malakae; mo hem i ripitim tu, nambafo o las japta blong sem profesi ia, be wetem smol jenis long wanem we i stap long ol Baebol blong yumi. Long ples blong fas ves olsem we i stap long ol buk blong yumi, hem i talem olsem ia:

“From luk, dei ia bae i kam we bae i bon olsem wan oven, mo evriwan we oli flas, yes, mo evriwan we oli mekem ol rabis samting, bae oli bon olsem ol sot stamba blong wit long wan garen we oli havestem finis, Lod blong ol Host i talem, we bae i livim olgeta wetem rus o branj we i no gat”

Mo bakegen, hem i bin ripitim namba faev ves ia olsem: “Luk, bae mi soemaot long yufala, Prishud ia, tru long Elaeja, profet ia, bifo bigfala rabis dei ia blong Lod i kam.”

Hem i bin ripitim tu, nekis ves i defren: “Mo bae hem i putum insaed long ol hat blong olgeta pikinini, ol promes we oli bin mekem wetem ol bubu blong olgeta, mo ol hat blong ol pikinini bae i kraeaot long ol bubu blong olgeta. Sapos i no bin olsem, bae ful wol ia i wes nating taem Hem i kam.”

Antap long ol samting ia, hem i bin ripitim, nambaleven japta blong Aesea, mo i stap talem se i no long taem bae i hapen. Hem i bin ripitim tu, nambatri japta blong Ol Wok, long namba twantetu mo namba twantetri ves, semmak nomo olsem we i stap long Niu Testeman blong yumi. Hem i bin talem se profet ia Hem i Kraes, be dei ia i no kam yet taem “olgeta we oli no lisin long voes blong hem, bae oli karemaot olgeta long medel blong ol pipol blong Lod,” be dei ia bae i kam i no longtaem.

Hem i bin ripitim tu, nambatu japta blong Joel, stat long namba twante-eit ves kasem las ves. Hem i bin talem tu se hemia i no hapen yet, be i no long taem bae i hapen. Mo hem i gohed blong talem se taem we ol Jentael bae oli kasem fulwan blong gospel, we i stap kam i no longtaem. Hem i bin ripitim plante narafala toktok long skripja, mo givim plante klia tingting we oli no save tokbaot long ples ia.

Bakegen, hem i bin talem long mi, se taem we mi kasem ol buk ia, we hem i bin tokbaot—from taem we mi mas kasem olgeta i no hapen yet—mi no mas soemaot olgeta long eni man; mo tu, plet blong kavremap jes, wetem Yurim mo Tumim; long olgeta nomo we God i givim oda long mi,

*Visen ia i open  
long maen  
blong mi, blong  
mi save luk  
ples ia we oli  
putum ol buk  
ia long hem.*

blong soem long olgeta; sapos mi mekem olsem bae mi kasem panis. Long taem we hem i stap toktok wetem mi long saed blong buk ia, visen i bin open long tingting blong mi we mi save luk ples ia we oli berem buk ia long hem. Mo we i klia gud mo i stret, mekem se mi bin save ples ia bakegen taem mi bin visitim ples ia.

Afta mi bin finis toktok wetem enjel ia, mi bin luk laet long rum i stat blong kam raonem man ia we i bin toktok long mi, mo i bin gohed blong mekem olsem kasem taem we rum i bin stap tudak bakegen be raonem hem nomo. Nao long stret taem we samting ia i kamaot, mi bin luk wan bigfala hol, olsem wan bigfala paep i go stret antap long heven, mo hem i bin go antap kasem taem we hem i bin lus evriwan, mo rum i bin stap olsem we i bin stap bifo we laet ia blong heven i bin kamaot.

Mi stap ledaon mo mi stap tingbaot spesel samting ia we i jes kamaot long mi, mo mi tingting hevi tumas long saed blong wanem we enjel ia i bin talem long mi; long sem taem long medel blong tingting hevi blong mi, mi bin faenem kwik taem se laet i stap kamaot bakegen long rum blong mi, mo long wan kwiktaem nomo, olsem we i bin stap, semfala mesenja ia blong heven i bin stap long saed blong bed blong mi bakegen.

**H**em i bin stat, mo bakegen i bin talemaot ol semfala samting we hem i bin mekem long nambawan taem we hem i bin kam. Evri toktok i semmak nomo, we afta hem i bin mekem samting

ia, hem i bin talemaot long mi ol bigfala jajmen we bae i kam long wol long jeneresen ia. Afta hem i bin talemaot ol samting ia, hem i bin go bak antap olsem we hem i bin mekem bifo.

Afta samting ia, ol tingting i bin go dip insaed long maen blong mi, i mekem se slip i bin ronwe long ol ae blong mi, mo mi ledaon wetem sapraes tumas long ol samting we mi bin luk mo mi bin harem. Be wanem bigfala sapraes blong mi long taem we mi bin luk semfala mesenja klosap long bed blong mi, hem i bin ademap wan woning long mi, i talem long mi se Setan bae i traem blong temtem mi (from we famle blong papa blong mi i no gat plante mane), blong mi kasem ol buk ia, blong stamba tingting blong kam rij. Samting ia i bin blokem mi, i se mi no mas gat eni narafala tingting



*Kumora Hil i stap samples long 5 kilometa, Saot Wes long fam blong Smit long Palmaera, Niu Yok. Long taem blong Josef, gras i bin kavremap fam ia long not, mo long saot i gat wanwan timba olbaot wetem ol dak bus. Oli bin berem ol buk ia long saed i go long Saot Wes, i no longwe antap. Foto: Ogis 1907.*

long ae blong mi, hemia nomo blong leftemap God, mo mi no mas folem eni narafala tingting be blong stanemap kingdom blong Hem nomo; sapos no, bae mi no save kasem olgeta.

Afta nambatri visit ia, hem i bin go bak antap long heven olsem bifo. Mo mi bin stap bakegen blong tingting hevi long olgeta defren kaen samting we i jes kamaot long mi; kwiktaem nomo olsem stret taem afta we mesenja blong heven i bin go antap aot long mi blong nambatri taem, faol i bin singaot, mo mi bin faenem se delaet i stap kam; i minim se ol storian blong mitufala i bin tekem klosap ful naet ia.



I no long taem afta mi bin girap mo aot long bed blong mi, mo bin gohed olsem evri taem blong mekem ol wok blong dei; be, long taem mi bin traem blong wok olsem ol narafala taem, mi bin faenem se bodi blong mi i slak we i mekem se mi no save mekem wok. Papa blong mi we i bin stap wok wetem mi, i bin faenem se wan samting



*Moronae i bin stap kambak wan taem evri yia, blong fo yia mo givim sam moa tijing long yangfala profet ia. Afta long ol fo yia ia, Josef i bin kasem ol buk ia mo stat blong transtetem Buk blong Momon.*

i no stret wetem mi, mo mi bin talem mi blong go long haos. Mi bin stat wetem stamba tingting blong go bak long haos; be, long taem we mi bin traem blong klaem ova long fanis aot long fil we mifala i bin stap wok long hem, paoa blong mi i bin lus evriwan, mo mi bin foldaon long graon olsem se mi ded, mo blong wan taem mi no bin save eni samting.

Fasfala samting we mi save tingbaot, i wan voes we i stap toktok long mi, i singaotem mi long nem blong mi. Mi bin lukluk i go antap, mo mi bin lukim semfala mesenja ia, i stanap

klosap long hed blong mi, laet i raonem hem olsem bifo. Afta hem i bin talemaot bakegen long mi evri samting we hem i bin talemaot long mi long naet bifo, mo i bin givim oda long mi, blong go long papa blong mi mo talem long hem long saed blong visen mo ol komanmen we mi bin kasem.

Mi bin obei; mi bin go bak long papa blong mi long fil, mo bin talemaot evri samting long hem. Hem i bin talem se samting ia i wan samting blong God, mo i bin talem long mi blong go mekem ol samting we mesenja i bin talemaot long mi. Mi bin livim fil mo mi bin go long ples ia we mesenja i bin talem long mi se ol buk ia i stap long hem, mo from visen we mi bin kasem i klia gud long saed blong samting ia, mi bin save ples ia long stret taem we mi bin kasem ples ia.

### Tabu Rekod ia

**K**losap long vilej blong Manjesta, Ontario Distrik, Niu Yok, i gat wan bigfala hil we i bigwan, we i moa hae long eni narafala hil long ples ia. Long wes saed blong hil ia, we i no longwe tumas, antap long hem, andanit long wan ston we i bigwan, ol buk ia i stap long wan ston bokis. Ston ia i bigwan, mo saed antap i raon long medel, mo i smol long saed, mekem se medel pat blong hem i save luk antap long graon, be saedsaed blong hem, graon i bin kavremap.

Afta mi bin tekemaot ol graon, mi bin tekem wan wud, we mi bin pusum lelebet andanit long saed blong ston ia, mo wetem smol paoa mi bin leftemap ston ia. Mi bin lukluk insaed mo i tru, long ples ia, mi bin luk ol buk ia, Yurim mo Tumim, mo plet blong kavremap jes, olsem we mesenja i bin talem. Bokis we oli stap slip long hem, oli bin mekem wetem ol ston we i fas tugeta long wan kaen simen. Long botom blong bokis, oli bin putum tu ston we oli krosem bokis ia, mo long tufala ston ia oli bin putum ol buk ia, mo ol narafala samting wetem olgeta.

Mi bin traem blong tekemaot olgeta, be mesenja i bin blokem mi, mo i talem bakegen long mi se taem blong tekemaot olgeta i no bin kam, mo tu bae i no kam, kasem fo moa yia stat long taem ia, be hem i bin talem long mi se mi mas kam long ples ia stret long wan yia blong taem ia, mo we bae hem i mitim mi long ples ia, mo se mi mas gohed blong mekem olsem kasem taem we bae i kam blong kasem ol buk ia.

**F**olem, olsem we hem i bin givim oda long mi, mi bin go long en blong evri yia, mo evri taem mi bin luk semfala mesenja mo mi bin kasem plante tijing mo save long hem, long evri storian

*Long wes saed  
blong hil, i no  
longwe, antap  
blong hem,  
andanit long  
wan ston we i  
bigwan, ol buk  
ia i stap long  
wan ston bokis.*

blong mitufala, long saed blong ol samting we Lod bae i mekem mo olsem wanem mo long wanem fasin hem i wantem olgeta blong lidim kingdom blong Hem long ol las dei.

From we papa blong mifala i no gat plante samting blong wol ia, i bin gat nid blong mifala i mas wok wetem ol han blong mifala, mo taem i gat janis oli stap pem mifala from ol wok we

mifala i stap mekem. Samtaem mifala i stap long haos mo samtaem mifala i aot long hom, mo wetem ol wok we mifala i stap gohed wetem, i helpem mifala blong gat wan gudfala laef.

*Josef i bin wok long plante wok mo hem i bin givim famle blong hem wan gudfala laef. Long 1825, hem i bin kasem wan wok long Jenango Kaonti, Niu Yok. Long ples ia hem i bin mitim Emma Heil, mo maredem hem long 18 Jenuware 1827.*

Ale, taem i bin kam blong kasem ol buk ia, Yurim mo Tumim, mo plet blong kavremap jes. Long twantetu dei blong Septemba, wan taosen eit hundred mo twanteseven, mi bin go olsem evri taem long en blong wan narafala yia long ples ia we oli bin putum olgeta, semfala mesenja blong heven i bin givim olgeta long mi wetem

toktok ia: Se mi mas lukaotem olgeta; se sapos mi mi kam slak mo lusum olgeta, o tru long eni mistek blong mi, bae God i mas katemaot mi; be sapos bae mi yusum evri wei blong mi blong sevem olgeta, kasem taem we hem, mesenja ia, bae i askem ol samting ia, God bae i lukaotem gud olgeta.

I no longtaem, mi bin faenemaot stamba tingting from wanem mi bin kasem strongfala toktok olsem blong holem olgeta i sef, mo from wanem hem i bin olsem we mesenja i bin talemaot se afta we mi bin mekem wanem we mi mas mekem wetem han blong mi, bae hem i askem ol samting ia. From afta we olgeta i bin faenemaot se mi holem ol samting ia, oli bin traem strong tumas long ol wei blong stilim ol samting ia long mi.. Oli yusum evri defren kaen trik we oli save tingbaot from stamba tingting ia. Ol fasin blong givim hadtaem we oli bin mekem long mi, i bin kam moa konkon mo strong bitim bifo. Mo plante grup blong ol pipol i bin stap rere oltaem blong kasem ol samting ia long mi sapos i save hapen. Be tru long waes tingting blong God, oli bin stap sef long ol han blong mi, kasem taem we mi bin mekem tru long ol samting ia, wanem mi mas mekem. Long taem we, folem wanem we mesenja i bin talemaot, mesenja i bin askem ol samting ia. Mi bin givim ol samting ia long hem; mo hem i holem ol samting long kontrol blong hem kasem dei ia, we i nambatu dei blong Mei, wan taosen eit hundred mo teti-eit. . . .

**L**ong namba faef dei blong Eprel, 1829, Oliva Kowdri, we mi neva luk hem bifo kasem taem ia, i bin kam long haos blong mi. Hem i bin talem long mi se hem i bin stap tijim skul raon long ples we papa blong mi i stap long hem, mo from Papa blong mi i stap go long skul ia, hem i bin stap long haos blong Papa blong mi wan taem, mo long taem ia we hem i stap, ol famle blong mi oli bin tokbaot long hem, wanem i stap hapen long mi afta we mi kasem ol buk ia, mo folem hemia , hem i kam blong askem long mi.

Tu dei afta we Mista Kowdri i kam (Hemia long namba 7 Eprel), mi bin stat blong transletem Buk blong Momon, mo hem i bin stat raet blong mi.


*Long Eprel 1829, Josef Smit, wetem Oliva Kowdri olsem man blong raetem ol rekod, i stat blong transletem Buk blong Momon tru long presen mo paoa blong God. Afta we Josef i finisim translesen, ol narafala man i bin gat spesel janis ia blong lukim ol buk ia we oli mekem wetem gol. Olgeta witnes ia, oli bin rekodem tu ol testimoni blong olgeta, mekem se “i mas gat tu no tri witnes blong mekem tok ya i stanap.” (Seken Korin 13:1).*

## Prishud i Kambak Bakegen

**M**itufala i stap gohed yet wetem wok blong translesen, taem, long manis we i stap kam (Mei 1829), long wan dei ia, mitufala i go insaed long bus blong prea mo askem Lod from ol samting blong baptaes mo fasin blong sakem ol sin, we mifala i bin faenem se oli tokbaot long



*Josef Smit wetem Oliva Kowdri, i bin kasem Prishud blong Aron long Jon Baptaes we i bin putum han blong hem antap long tufala, long 15 Mei 1829.*



*Oli bin oganaesem Jos blong Jisas Kraes blong Ol Lata-dei Sent insaed long hom blong Pita Witma Senia long 6 Eprel 1830. Kolosap long 60 pipol oli bin witnesem blong fulfilim nid ia se i mas gat sikis man i stap blong save stanemap wan niu grup blong rilijin folem loa blong Niu Yok.*

ol buk we mitufala i stap transletem. Long taem we mitufala i stap mekem samting ia, mo prea long Lod, wan mesenja we i kam long heven i bin kam daon long wan klaod blong laet, mo afta we hem i putum ol han blong hem antap long hed blong mitufala, hem i odenem mitufala, wetem ol toktok ia:

“Long yutufala, ol wokman blong mi we yumi semmak, long nem blong Mesaea, mi givim Prishud blong Aron, we i holem ol ki, blong wok blong ol enjel, mo blong gospel blong sakem sin, mo blong baptaes andanit long wota blong kasem fogivnes from ol sin; mo hemia bae oli neva tekemaot bakegen long wol kasem taem we ol pikinini boe blong Livae, oli givim, wetem glad hat, wan ofring long Lod wetem wan fasin we i klin mo stret.”


Hem i talem se Prishud ia blong Aron, i no gat paoa ia blong putum han antap long hed blong kasem presen ia we i Tabu Spirit, be hemia bae oli givim long mitufala afta; mo hem i bin givim komanmen long mitufala blong go mo kasem baptaes, mo hem i bin talem long mi, olsem wanem blong baptaesem Oliva Kowdri, mo afta long hemia, bae hem i baptaesem mi

**F**olem hemia, mitufala i bin go mo kasem baptaes. Mi bin baptaesem hem fastaem, mo afta hem i baptesem mi—afta mi bin putum ol han blong mi antap long hed blong hem mo

odenem hem i go long Prishud blong Aron, mo afta long hemia, hem i putum ol han blong hem antap long hed blong mi mo odenem mi i go long sem Prishud ia—olsem ia nao oli bin givim komanmen long mitufala.

**M**esenja ia we i bin visitim mitufala long taem ia mo givim Prishud long mitufala, i bin talem se, nem blong hem Jon, sem Jon ia we oli singaotem hem, Jon Baptaes insaed long Niu Testeman, mo hem i bin mekem ol samting andanit long oda blong Pita, Jemes, mo Jon we oli bin holem ol ki blong Prishud blong Melkesedek, mo talem se, long stret taem blong hem, bae oli givim long mitufala, mo se bae oli singaotem mi, nambawan Elda blong Jos, mo Oliva Kowdri olsem nambatu. Hem i long nambafitin dei blong Mei, 1829, we mitufala i kasem odinesen andanit long han blong mesenja ia, mo bin kasem baptaes.


Stret afta we mitufala i kamaot long wota afta long baptaes blong mitufala, mitufala i bin kasem wan gudfala eksperiens long ol blessing we i fulap



long glori long Papa blong yumi long Heven. I no long taem nating afta we mi baptaesem Oliva Kowdri, Tabu Spirit, i foldaon long hem, mo hem i bin stanap mo stat blong profesae long plante samting we i no longtaem, bae oli hapen. Mo bakegen, afta we hem i baptaesem mi, mi bin gat tu, spirit blong profesi, mo taem mi stanap, mi bin stap profesae long saed blong gru blong Jos ia, mo plante moa narafala samting blong Jos, mo jeneresen ia blong ol pikinini blong ol man. Mitufala i bin fulap wetem Tabu Spirit, mo stap glad long God blong sevem ol sol blong yumi.

*Hemia, hem i tru mo simpol testimoni blong Josef Smit, we i stap tokbaot ol samting we i bin hapen we i lid i go long Restoresen blong gospel mo stat blong Jos blong Jisas Kraes blong Ol Lata-dei Sent.*

*Blong save ful stori blong Josef Smit, luk long Joseph Smith—History insaed long Pearl of Great Price (Perel blong Bigfala Praes) o History of the Church (Histri blong Jos), 1:2–79.*



*Buk blong Momon, we oli bin printim blong fastaem long 1830, naoia oli stap mekem mo givimaot long moa long 80 lamwis raon long wol.*